



CONVENIO DE COLABORACION ENTRE A CONSELLERIA DE CULTURA, EDUCACIÓN E ORDENACIÓN UNIVERSITARIA DA XUNTA DE GALICIA E A UNIVERSIDADE DE SANTIAGO DE COMPOSTELA PARA A REALIZACIÓN DUNHA ACTUACIÓN ARQUEOLÓXICA NO CASTRO DE DOADE, LALÍN (PONTEVEDRA)

Santiago de Compostela, 19 de maio de 2016

REUNIDOS

Dunha parte, Don Román Rodríguez González, que actúa en representación da Consellería de Cultura, Educación e Ordenación Universitaria, en virtude do seu cargo de conselleiro, en exercicio das facultades que lle confire o artigo 34 da Lei 1/1983, do 22 de febreiro, reguladora da Xunta e da súa Presidencia, así como o artigo 7 da Lei 9/2007, do 13 de xuño, de subvencións de Galicia.

Doutra parte, reitor da Universidade de Santiago de Compostela, con CIF Q1518001A, e domicilio na praza do Obradoiro, s/n, 15705, Santiago de Compostela, que actúa en nome e representación da Universidade de Santiago, en virtude das facultades que lle confire a Lei orgánica 6/2001, do 21 de decembro, de universidades, o Decreto 14/2014, do 30 de xaneiro, polo que se regulan os estatutos da Universidade de Santiago de Compostela e do seu nomeamento mediante o Decreto 62/2014, do 28 de maio.

Ambas as dúas partes teñen plena capacidade para levar adiante o presente convenio de colaboración e polo tanto,

EXPOÑEN

Primeiro: que a Xunta de Galicia asume a xestión das funcións sobre o patrimonio cultural en virtude do Real decreto 2434/1982, do 24 de xullo, sobre o traspaso de funcións do Estado á Comunidade Autónoma de Galicia en materia de cultura, de acordo co establecido no artigo 27.18 do Estatuto de Autonomía, en consonancia co estipulado no artigo 148.1.16 da Constitución Española, ámbito desenvolvido na Lei 8/1995, do 30 de outubro, do patrimonio cultural de Galicia.

Segundo: que a Universidade de Santiago de Compostela (USC) é unha entidade de dereito público que desenvolve actividades de formación, investigación e desenvolvemento científico e tecnolóxico

Terceiro: O Castro de Doade, Lalín, propiedade da Asociación de amigos do Museo “Casa do Patrón”, é un xacemento arqueolóxico onde con financiamento privado fixéronse escavacións arqueolóxicas encamiñadas á investigación para a súa futura posta en valor, para o gozo libre e gratuíto da comunidade en xeral, dado o interese tanto científico para a súa investigación, como divulgativo, estando ante unha oportunidade de poder poñer en valor un xacemento arqueolóxico singular nunha zona como é o Deza onde non temos outros elementos arqueolóxicos postos en valor para o seu uso didáctico.

Cuarto: que é de interese común de ambas as dúas partes, actuar de forma coordinada para a realización de actuacións e o intercambio de experiencias de coñecemento relacionadas coa conservación do patrimonio cultural.



Para tal efecto as partes conveñen na sinatura do presente convenio, que se rexerá polas seguintes

CLÁUSULAS

Primeira: obxecto do convenio

É obxecto do presente convenio regular as bases de colaboración entre a Consellería de Cultura, Educación e Ordenación Universitaria da Xunta de Galicia e a Universidade de Santiago de Compostela, para a realización dos traballos de **escavación e investigación arqueolóxica do xacemento do Castro de Doade**, en Lalín, Pontevedra, propiedade da Asociación de Amigos do Museo Casa do Patrón.

De conformidade co establecido no artigo 26 da Lei 9/2007, do 13 de xuño, de subvencións de Galicia considérase que a imposibilidade de promover a concorrência pública para a realización desta actuación deriva da singularidade da actividade subvencionada, xa que a USC é a entidade promotora deste proxecto, actuación que se encadra dentro da liña de actividades que contribúen ao enriquecemento do patrimonio cultural galego ao tempo que se considera de interese social a realización da mesma, xa que contribuirá á investigación e futura posta en valor para a sociedade, dun xacemento que comezouse a investigar co fin da súa futura posta en valor con iniciativa privada, nunha zona (Comarca do Deza), carente deste tipo de contedores postos en valor e de acceso libre e gratuito e que con esta actuación levaría un forte impulso no seu obxectivo. Así mesmo, as intervencións obxecto do presente convenio están incluídas no *Plan estratéxico para a protección e conservación do patrimonio cultural de Galicia* da Dirección Xeral do Patrimonio Cultural, dentro do obxectivo operativo *Conservar o patrimonio cultural galego*, que inclúe medidas para a conservación do patrimonio arqueolóxico, e cumpre con todos os criterios obxectivos fixados nesta programación.

Segunda: achega económica

A Consellería de Cultura, Educación e Ordenación Universitaria da Xunta de Galicia contribuirá con cargo á aplicación orzamentaria 10.21.433A.744.0 dos orzamentos xerais da Comunidade Autónoma, cunha achega máxima de **20.000,00 €** na anualidade de 2016.

A achega económica da consellería irá destinada ao financiamento da actividade de investigación no Castro de Doade.

O importe da subvención percibida para este proxecto non poderá en ningún caso ser de tal contía que, illada ou en concorrência con subvencións ou axudas doutras administracións públicas ou doutros entes públicos ou privados supere o custo da actividade que vai desenvolver o beneficiario.

Terceira: obrigas do beneficiario

- Contratar os medios humanos, técnicos e materiais necesarios para o axeitado desenvolvemento dos traballos, de acordo coa lexislación de contratos do sector público.
- Executar, no prazo de vixencia do convenio, o investimento obxecto deste convenio.



- Solicitar á Consellería de Cultura, Educación e Ordenación Universitaria da Xunta de Galicia os informes e as autorizacións preceptivas das actuacións, así como de calquera modificación que xurda no seu desenvolvemento.
- Con carácter previo ao inicio da intervención arqueolóxica, a USC, Departamento de Historia I, terá que presentar o proxecto arqueolóxico que deberá cumprir o disposto no Decreto 199/1997, do 10 de xullo, polo que se regula a actividade arqueolóxica da Comunidade Autónoma e pola Lei 8/1995 do 30 de outubro, do patrimonio cultural de Galicia.
- O beneficiario consinte expresamente a inclusión dos datos relevantes deste convenio nos rexistros públicos que proceda, de acordo co artigo 16 da Lei de subvencións de Galicia.
- Incluír a imaxe institucional da consellería en todo o material gráfico e divulgativo da actividade, como entidade colaboradora.

Cuarta: comisión paritaria

Noméase unha comisión mixta de seguimento e control integrada por dous membros de cada unha das partes. Esta comisión será a encargada de solucionar as controversias que se poidan suscitar na interpretación do convenio.

Quinta: xustificación dos investimentos

Gastos subvencionables: Considéranse subvencionables os gastos especificados no artigo 29 da Lei de subvencións de Galicia que respondan de xeito indubidable á natureza da actividade subvencionada e se realicen no período de vixencia do convenio.

Os tributos son gasto subvencionables cando o beneficiario da subvención os aboa efectivamente. En ningún caso se consideran gastos subvencionables os impostos indirectos cando sexan susceptibles de recuperación ou compensación, nin os impostos persoais sobre a renda.

De acordo co artigo 29.2 da Lei de subvencións de Galicia, considerarase gasto realizado o que foi efectivamente pagado con anterioridade ao remate do período de vixencia do convenio.

Documentación que ten que presentar o beneficiario: para a percepción da axuda será necesario presentar, ante a Dirección Xeral do Patrimonio Cultural, orixinal ou copia compulsada da seguinte documentación:

- Certificación detallada dos gastos, expedida pola intervención ou polo órgano que teña atribuídas as facultades de control da toma de razón en contabilidade, e do cumprimento da finalidade para a que foi concedida.
- Declaración responsable expedida polo órgano competente, comprensiva das outras axudas e ingresos percibidos ou solicitados para este proxecto, na que se indique a entidade concedente, a data e o importe total (Anexo I).



- Declaración responsable do órgano competente da entidade, de estar ao día no cumprimento das obrigas tributarias ou fronte á Seguridade Social e de non ter pendente de pagamento ningunha outra débeda coa Administración pública da Comunidade Autónoma. Esta declaración será comprensiva do cumprimento de obrigas por reintegro de subvencións (Anexo II).
- Declaración responsable de titularidade da conta bancaria (Anexo III).
- Informe sobre as actividades realizadas, onde se describan os resultados das actuacións arqueolóxicas, reflectindo o proceso do traballo seguido de acordo cos proxectos autorizados ou actividades obxecto do convenio.

En todo caso para o libramento da subvención será imprescindible o certificado acreditativo da verificación realizada, emitido pola Dirección Xeral do Patrimonio Cultural, no que se detallará o alcance das comprobacións practicadas.

Prazo para a presentación da documentación xustificativa: o prazo máximo para a xustificación dos investimentos será ata o **31 de outubro de 2016**.

Pagamento da subvención: realizarase unha vez comprobada a xustificación presentada e a realización do proxecto para o cal se concedeu. O pagamento realizarase pola parte proporcional da contía da subvención efectivamente xustificada.

Cando se advirta un exceso de financiamento da actividade subvencionada, respecto do custo do proxecto, a Consellería de Cultura, Educación e Ordenación Universitaria efectuará a dedución polo importe total do exceso, ata o límite da subvención outorgada por ela.

Efectos da falta de xustificación: a falta de xustificación dos investimentos dentro do prazo establecido, determinará a perda do dereito ao cobramento total ou parcial da subvención.

Sexta: facultades da Consellería de Cultura, Educación e Ordenación Universitaria.

A Consellería de Cultura, Educación e Ordenación Universitaria, a través dos seus servizos técnicos, resérvase a facultade de realizar as inspeccións e as comprobacións que considere necesarias co fin de asegurar o cumprimento das normas e requisitos cos que se concede esta axuda.

A Consellería de Cultura, Educación e Ordenación Universitaria asume a obriga de achegar a cantidade prevista na cláusula segunda do presente convenio, sen que baixo ningún concepto poida quedar vinculada a responsabilidades de ningún tipo nas que puidera incurrir a outra parte, incluída as dos ámbitos fiscal e laboral. A subscrición deste convenio non leva consigo por si soa relación contractual ningunha cos profesionais que realicen a actividade obxecto do convenio.

Sétima: período de vixencia

A vixencia do presente convenio será dende o día da súa sinatura ata o **15 de novembro de 2016**, sen prexuízo de que se subvencionen os gastos realizados para obxecto do convenio dende o 1 de xaneiro do vixente exercicio orzamentario.

Oitava: outras obrigas do beneficiario

- Non alterar o destino da achega.
- Realizar a correspondente execución segundo o plan proxectado pola Consellería de Cultura, Educación e Ordenación Universitaria.
- Admitir as inspeccións e controis que establezan os servizos técnicos da Consellería de Cultura, Educación e Ordenación Universitaria.
- Efectuar a xustificación de gasto na forma preceptuada neste convenio
- O beneficiario deberá dar cumprimento ás obrigas de publicidade que se establecen no artigo 18 da Lei 38/2003, do 17 de novembro, xeral de subvencións, modificado polo artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa.
- Prestar colaboración e facilitar tanta documentación lle sexa requirida no exercicio das funcións de fiscalización e control que lle corresponden á Intervención Xeral da Comunidade Autónoma, ao Tribunal de contas e ao Consello de Contas
- Ademais son obrigas do beneficiario todas as establecidas no artigo 11 da Lei de subvencións de Galicia.

Novena: subcontratación e reintegro

A entidade beneficiaria poderá subcontratar totalmente a actividade. En ningún caso poderán subcontratar actividades que, aumentando o custo da actividade subvencionada, non acheguen valor engadido ao seu contido.

Considérase subcontratación a concertación total ou parcial da actividade que constitúe o obxecto da subvención. Quedan fóra deste concepto os gastos nos que ten que incurrir a entidade para a realización de seu da actividade subvencionada.

En todo o non previsto expresamente nesta cláusula para a subcontratación, estarase ao disposto polo artigo 27 da Lei de subvencións de Galicia e no artigo 43 do seu regulamento.

Procederá o reintegro parcial ou total da subvención nos casos previstos no artigo 33 da Lei de subvencións de Galicia.

Décima: publicidade do convenio

A sinatura deste convenio suporá o consentimento expreso por parte da Universidade para que a Administración galega inclúa e faga públicos os datos referidos a dito convenio, de conformidade co artigo 15 da Lei 1/2016, do 18 de xaneiro, de transparencia e bo goberno e o disposto nos Decretos 126/2006, do 20 de xullo, e 132/2006, do 27 de xullo, polos que se regulan o rexistro de convenios da Xunta de Galicia e os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, respectivamente.



O contido deste convenio será publicado na Base de Datos Nacional de Subvencións, nos termos previstos no artigo 20 da Lei 38/2003, do 17 de novembro, xeral de subvencións, modificado polo artigo 30.3 da Lei 15/2014, do 16 de novembro, de racionalización do sector público e outras medidas de reforma administrativa.

Décima: réxime xurídico

En todo o non previsto no presente convenio será de aplicación a Lei 9/2007, do 13 de xuño, de subvencións de Galicia e a súa normativa de desenvolvemento. Aplicarase con carácter supletorio a Lei 38/2003, do 17 de novembro, xeral de subvencións.

As cuestións litixiosas xurdidas da aplicación do presente convenio, e non solucionadas en vía administrativa, serán resoltas pola xurisdición contencioso-administrativa.

Décimo primeira: rescisión do acordo

O presente convenio resolverase polo incumprimento total ou parcial dalgunha das cláusulas que o regulan.

E en proba de conformidade cos termos do presente convenio, as partes comparecentes asínano e rubricano por duplicado no lugar e na data expresados.

O conselleiro de Cultura, Educación e
Ordenación Universitaria,

O reitor da Universidade de Santiago de
Compostela

Román Rodríguez González